

A R R E S T

DE LA COVR

no. 7

DES MONNOYES,

Portant deffenses d'exposer ni recevoir
aucuns faux douzains, nommément
de fer, cuiure & plomb, ceux de
fer & cuiure vulgairement appelez
douzains de la Rochelle.



A P A R I S.

Chez SEBASTIEN CRAMOISY Imprimeur
ordinaire du Roy és Monnoyes, rue
Saint Iacques, aux Cicognes.

M. DC. XXXIII.

AVEC PRIVILEGE DV ROY.



*Extraict des Registres de la Cour
des Monnoyes.*

S V R ce que le Procureur
general du Roy a remon-
stré à la Cour, que par son
Arrest du 7. Sept. 1628.
ayant voulu pourvoir à l'exposition
qui estoit faicte d'aucuns douzains de
fausse fabrication, des Patars de Flan-
dres, & autres menuës monnoyes de bas
billō décriées desquelles avec autres bōs
douzains estoient confusément faits des
payemēs au poids, sans les voir ny com-
pter, auroit esté fait defenses de bailler,
ny recevoir des douzains au poids, ains
enjoint les compter, ce faisant trier &
reietter ceux de fausse fabrication, Pa-
tars de Flandre, & autres menuës mon-

noyes. Au preiudice desquelles defences non seulement y a esté contreuenue, mais depuis quelque temps s'est introduit de faux douzains de fer & cuiure, qui s'apportent des Prouinces de Poictou & autres circonuoisines en ceste ville, communément appelez douzains de la Rochelle, dont on commence à faire des payemens de sommes notables, ainsi qu'il s'est faict & fait des Patarsés Prouinces de Picardie, Champagne, & Normandie, & des quartilles dás les Prouinces limitrophes d'Espagne. Requerant pour arrester l'exposition & cours desdits faux douzains, qu'ils soient décriez de tout cours & mise, avec deffenses à toutes personnes d'en exposer ni recevoir, & à tous Messagers, Voicturiers & autres, de les transporter & enuoyer de ville à autre, sur peine de confiscation desdites monnoyes, & de celles avec lesquelles elles se trouuerront meslees, & d'amende arbitraire. Et que su

lesmesmes peines deffenses soient aussi
 faites de faire aucuns payements de dou-
 zains au poids, ains par compte, pour
 en estre lesdits faux douzains separez
 d'auec les bons, & qu'il sera informé
 contre les Fabricateurs & Expositeurs,
 & ceux qui en ont faict ou faict faire les
 transports & expositions, sur les peines
 portees par les Edicts & Reglements
 des Monnoyes. La matiere mise en de-
 liberation. LA COVR faisant droict
 sur le Requisitoire dudit Procureur
 General, a faict & fait expresses inhi-
 bitions & deffenses à toutes personnes
 de quelque estat & condition qu'elles
 soient, d'apporter ou enuoyer, exposer
 ny receuoir aucuns faux douzains, nom-
 mément de fer, cuiure & plomb, ceux
 de fer & cuiure vulgairement appelez
 douzains de la Rochelle, & à tous Mes-
 sagers, Voicturiers, leurs Facteurs ou
 autres de s'en charger, à peine aux con-
 treuenants de confiscation, tant desdits

faux douzains que des bons, & autres especes de monnoyes qui y pourroient estre meslees, de cinq cens liures d'amende, & plus grandes peines portees par les Ordonnances. Ordonne ladite Cour qu'à la requeste dudit Procureur General il sera diligemment informé contre les Fabricateurs & Expositeurs desdits douzains de fer, cuiure & plomb, & contre ceux qui en ont enuoyé, apporté, receu & débité en cette ville de Paris, & autres lieux de ce Royaume, & encores contre les contreuenants au present Arrest; & sera incessamment procedé à l'instruction de leur procès, le tiers desquelles amendes & confiscations sera adiugé aux denonciateurs suiuant l'Ordonnance. Et à ce qu'aucun n'en puisse pretendre cause d'ignorance, le present Arrest sera leu & publié à son de trompe & cry publicq, & affiches mises és carrefours & lieux accoustumez de cette dite ville, & coppies colla-

tronnees, signees d'iceluy Greffier de
ladite Cour, enuoyees par les Prouin-
ces de ce Royaume aux Iuges Royaux,
& Substituts dudit Procureur General
pour estre pareillement leu & publié,
& tenir la main à l'execution & entrete-
nement d'iceluy: lesquels seront tenus
certifier ladite Cour de leur diligence
au mois. Faict en la Cour des Mon-
noyes le treiziesme de Iuillet mil six
cens trente trois.

Signé, DELAISTRE.

*Le quinziemesme iour de Iuillet mil six cens
trente trois, l'Arrest de la Cour cy-dessus escrit,
& les inhibitions & defenses y mentionnees,
ont esté de l'Ordonnance de ladite Cour, & en
la presence de nous Jean Gerin premier Huif-
sier & Niolas Lambert, Huissier en icelle, leus
& publiez à son de trompe & cry publicq, par la
ville & faux-bourgs de Paris, lieux & en-
droits accoustumez, par Simon Leduc Iuré
Crieur de ladite ville, Preuosté & Vicomté de
Paris, accompagné de Mathurin Noiret, iuré
Trompette, & de deux autres Trompettes. Et
iceluy Arrest affiché par nous Huissiers susdits,
aux Carrefours & lieux accoustumez, tant de*

8
cette ville que faux-bourgs , à ce que du con-
tenu en iceluy nul n'en pretende cause d'igno-
rance , sur les peines y mentionnees.

Collationné à l'original par moy Greffier en chef
en la Cour des Monnoyes souffigné.